

ANALISIS KRITIKAL MENGENAI POLITIK ISLAM DI MALAYSIA

Hamidah Sulaiman
hamidahami8@gmail.com
Fakulti Pengajian Islam, Universiti Kebangsaan Malaysia, Bangi

Muhammad Nazir Alias
nazir@ukm.edu.my
Fakulti Pengajian Islam, Universiti Kebangsaan Malaysia, Bangi

Mohd Sham Kamis
mohdsham856@ukm.edu.my
Pusat PERMATApintarTM Negara, Universiti Kebangsaan Malaysia, Bangi

ABSTRAK

Parti politik Islam merupakan *wadah* atau platform untuk menjalankan dakwah dan menegakkan negara Islam yang berteraskan Al-Quran dan Sunnah. Di samping itu, politik Islam juga mengaplikasikan *ijma'*, *qiyas*, *ijtihad* serta *maqasid al-syariah* dalam menentukan sesuatu hukum. Pembahasan mengenai hukum pilihan raya sering menjadi topik perbincangan para ilmuan Islam. Ini adalah kerana pilihan raya ialah sistem bagi rakyat memilih calon pemimpin untuk mewakili rakyat. Justeru, kajian ini bertujuan untuk mengenalpasti tentang keterlibatan dalam parti politik Islam di Malaysia berserta dengan hukum-hukamnya. Persoalan tentang hukum keterlibatan dalam politik di Malaysia merupakan satu topik yang menarik bagi ilmuan Islam. Kajian ini dibuat dengan meninjau literature yang berkaitan melalui analisis dokumen. Data yang diperolehi dianalisis secara kritikal dan deduktif. Hasil kajian mendapati hukum keterlibatan dalam parti politik Islam adalah *wajib* berdasarkan menegakkan pemerintahan Islam. Dapatan kajian juga menunjukkan perspektif pemikiran Al-Qaradhawi mengenai demokrasi digunapakai dalam konteks negara Islam terutama berkaitan pilihan raya.

Katakunci: Hukum, pilihan raya, politik Islam, *maqasid al-syariah*, demokrasi, Malaysia

CRITICAL ANALYSIS REGARDING ISLAMIC POLITIC IN MALAYSIA

ABSTRACT

Islamic political party is considered as a *wadah* or a platform to spread *dakwah* and to establish Islamic State based on *Al-Quran* and *Sunnah*. Besides, Islamic politics has applied *ijma'*, *qiyas*, *ijtihad* and *maqasid al-syariah* to determine the *hukm*. The discussion on *hukm* of election or voting has often become the topic of discussion of Islamic scholars. This is because the election is

a system for people to choose a future leader to represent the people. In addition, this study aims to identify the participation of Islamic parties in Malaysia and its jurisdiction. As a result of questions regarding the participation in Islamic parties in Malaysia is an interesting topic to Islamic scholars. This research was conducted by reviewing literature which was gathered and analysed critical and deductive approaches. This finding main shows that the *hukm* of participation in Islamic politics is *wajib* (obligatory) to uphold the Islamic leadership. This research also shows that the political perspective of Al Qaradhawi regarding democracy is used by Islamic state especially with regard to election.

Keywords: Election *hukm*, Islamic politics, *maqasid al-syariah*, democracy, Malaysia

PENGENALAN

Peranan sebuah parti politik Islam adalah sangat penting dan mulia. Ini adalah kerana tanggung jawabnya amat diperlukan demi untuk menegakkan hukum Allah SWT di mukabumi ini. Sesungguhnya politik Islam yang berjaya iaitu yang mampu membawa negara dan rakyatnya melalui proses perubahan dari segi tindak tanduknya mengikut apa yang dikehendaki oleh agama Islam. Ini jelas kelihatan apabila umat Islam mahukan syariat Islam ditegakkan dan seterusnya diamalkan dalam kehidupan mereka. Politik Islam menggunakan *Al-Quran* dan *As-Sunnah* sebagai sumber rujukannya. Di samping itu, politik Islam menggunakan *ijma'*, *qiyas* dan *ijtihad* dalam perkara yang tiada nas yang mengenainya. Selain dari itu pendekatan hukum berasaskan kepada *maqasid al-syariah* turut juga digunakan (Mohamad Zaidi Abdul Rahman, 2014).

Permasalahan umum atau polemik yang berlaku sekarang ini adalah mengenai keterlibatan seorang muslim dalam pilihan raya. Permasalahan ini sering dibincangkan di media sosial termasuk suratkhbar, majalah dan jurnal. Dalam kalangan cerdik pandai juga turut membahaskan mengenai peranan politik Islam dalam sebuah negara majmuk seperti Malaysia. Ini adalah kerana politik bukan hanya berkait rapat dengan pentadbiran sesebuah negara malahan ia juga turut melibatkan pentadbiran kekeluargaan dan kemasyarakatan. Menurut Al Mawardi, “kepimpinan atau keimamahan diletakkan untuk menggantikan tempat kenabian dalam memelihara agama dan politik keduniaan” (Dhia al-Din Al Ris, 2001).

Malaysia sebagai negara yang mengambil sistem demokrasi berparlimen dan berpelembagaan sebagai kaedah pemerintahannya. Walaupun begitu, sistem demokrasi yang dijalankan di Malaysia bukanlah sepenuhnya mengikut ala barat (Muhamad Zuhaili Saiman, 1987). Sejak merdeka, Malaysia sebagai negara Islam dan mengambil pendekatan demokrasi melalui sistem pilihan raya dengan tertubuhnya parti-parti politik dalam sistem pemerintahan negara. Namun begitu, terdapat perselisihan di antara parti-parti yang bertanding samada parti politik Islam atau parti politik

Melayu (Mohd Izani Mohd Zin, Hussin Mohamed 2005). Sehubungan dengan itu terdapat isu-isu utama perselisihan politik Islam dan Melayu seperti PAS menolak pendekatan Islam UMNO dan dasar Islamisasi UMNO. Ini adalah menurut PAS program Islamisasi UMNO bersifat kosmetik dan tidak Islamik (H.Maisarah, 2012). Selain dari itu, isu kepimpinan Melayu dan kepimpinan Islam turut juga diperdebatkan di kalangan ahli politik Melayu. Oleh itu, pendekatan kedua-dua parti dominan Melayu iaitu UMNO dan PAS adalah berbeza. Parti UMNO berasaskan kepada agenda Melayu manakala PAS pula, di bawah slogan kepimpinan ulama berasaskan kepada kepimpinan Islam. Realitinya kedua-dua pihak baik UMNO maupun PAS perlu berbincang mengenai perpaduan Melayu atas kerangka Islam (Jaffary Awang, Abdul Rahman Mahmood, 2015).

PERNYATAAN MASALAH

Kaedah pemilihan pemimpin di Malaysia sering mendapat perhatian dunia luar. Terdapat sebahagian ilmunan Islam menyatakan keterlibatan dalam politik melalui sistem pilihan raya adalah diwajibkan. Namun terdapat Sarjana Islam seperti Sheikh Muhammad Rashid Redha, Al Imam As Syahid Hasan Al Banna dan Yusuf Al Qaradawi pula berpendapat pilihan raya adalah diharuskan (Zuhaili Saiman, 1987).

Malaysia merupakan negara yang mempunyai rakyat yang berbilang kaum dan multi etnik serta multi agama. Ini bermakna kewajipan mengundi itu adalah untuk semua rakyat Malaysia yang berkelayakan. Begitu juga permasalahan dalam pilihan raya terdapat rakyat yang tidak mahu mengundi dan juga yang merosakkan undian mereka (Zaharuddin Abdul Rahman, 2013). Semuanya ini perlu ada penyelesaiannya demi untuk mendapat pilihan yang telus dan berintegriti.

Terdapat juga sebahagian ilmunan Islam yang lain membincangkan tentang rakyat yang tidak mengundi atau tidak memberikan undi kepada yang layak dengan sengaja. Malahan ada juga pengundi yang sengaja merosakkan undi mereka (Muhamad Zuhaili Saiman 1987, Zaharuddin Abdul Rahman 2013). Perbincangan mengenai dalil-dalil yang berkaitan melahirkan hukum keterlibatan dalam politik Islam. Sehubungan dengan itu kepentingan kajian adalah untuk melahirkan pengundi, wakil rakyat atau wakil parlimen serta pemimpin yang adil lagi amanah.

Di samping itu, wujud konflik antara calon dan juga parti yang bertanding. Ini adalah disebabkan wujud pertentangan ideologi di antara calon (Syed Hussein, 1994). Semuanya ini mengundang silap faham atau *misconception* di antara pengundi dan juga calon yang hendak dipilih. Lebih lagi jika terdapat penipuan undi atau juga rasuah serta lompat parti. Ini menunjukkan terdapat kekurangan dan kelemahan dalam menjalankan sistem pilihan raya.

Kajian ini menganalisis secara kritis pandangan ilmuan Islam yang silam dan juga ijthad ulama' kontemporari menerusi penulisan-penulisan mereka. Selain dari itu, pandangan ilmuan tentang *imamah* atau kepimpinan juga dianalisis secara deduktif bagi membuat kesimpulan mengenai hukum keterlibatan dalam politik Islam di Malaysia.

ANALISIS KRITIKAL MENGENAI POLITIK ISLAM DI MALAYSIA

Bagi menjawab permasalahan kajian ini, penyelidik menganalisis beberapa permasalahan yang timbul dalam politik Islam di Malaysia. Di samping itu, analisis perbandingan mengenai parti-parti politik Islam di Malaysia dengan melihat kekuatan dan kelemahannya. Selain itu, pandangan tentang politik Islam oleh pemikir politik Islam seperti Al Qaradhawi juga diketengahkan.

Pembahasan secara kritikal mengenai politik Islam dengan membuat perbandingan mengenai kekuatan dan kelemahan juga turut dianalisis bermula dengan sistem politik Islam di zaman Rasulullah SAW.

Politik Islam di Zaman Nabi Muhammad SAW

Semasa di Mekah iaitu sebelum Nabi SAW diutus menjadi Rasul, Rasulullah telah menunjukkan kebijaksanaan dalam pengurusan, amanah, berkemampuan untuk menyelesaikan sesuatu konflik dalam permasalahan yang berlaku dengan baik. Peristiwa meletakkan balik *hajar al aswad* ke tempat asalnya telah membuktikan beliau mempunyai kewibawaan yang tinggi dan ketokohan sebagai pemimpin. Di samping itu, memiliki kemahiran dan strategi yang tinggi dalam menyelesaikan sesuatu konflik dan permasalahan yang berlaku (Abd. Aziz Mohd Zin, 2012).

Di Mekah juga, Rasulullah SAW telah menjalankan dakwah secara *sirri* (rahsia) selama tiga tahun untuk membina kekuatan Islam dalam kalangan sahabat-sahabatnya. Ketokohan dan kepimpinan Nabi Muhammad SAW telah pun menyerlah pada masa di Mekah lagi iaitu semasa beliau diangkat menjadi Rasulullah (Utusan Allah) dan mendapat wahyu pertama pada malam 17 Ramadan bersamaan 6hb Ogos 610 M. Pada masa itu Rasulullah SAW sedang '*uzlah* (mengasingkan diri) di Gua Hira'. Setelah menerima wahyu pertama, Allah SWT memerintahkan Rasulullah SAW menyampaikan dakwah secara terang-terangan kepada kaum-kerabat dan seluruh masyarakat di Mekah.

Zaman pemerintahan Rasulullah SAW secara khusus bermula dengan beberapa orang penduduk Mekah yang dipilih oleh Allah SWT untuk berhijrah ke Madinah pada 24/9 622 Masehi bersamaan 12 RabiulAwal tahun pertama Islam (Hijrah). Di Madinah bermulanya penubuhan Negara Islam.

Di samping itu, membentuk Piagam Madinah merupakan satu agenda Rasulullah SAW untuk membina satu hubungan nasional dalam masyarakat Madinah. Piagam Madinah adalah bersifat kontrak sosial yang merupakan muamalah politik yang nyata (Abdul Hadi Awang, 2011).

Di Madinah, Rasulullah SAW tidak menghalang kaum Muslimin mengadakan hubungan yang baik dengan golongan bukan Islam seperti orang Yahudi selagi mereka tidak mendatangkan ancaman kepada Islam iaitu mereka hendaklah memberi ketaatan kepada pemerintah Islam. Ini menunjukkan sistem politik Islam menegakkan perinsip keadilan dan kesamarataan dalam menjaga hak bagi yang lemah tanpa mengira bangsa, etnik maupun warna kulit (Khalid ibn 'Ali Ibn Muhamad, t.th). Politik Islam juga berperanan sebagai wasilah dakwah dan menolak sistem sekularisme. Kebangkitan para ulama dan tokoh Islam memberi amaran keras dan menolak pendapat yang memisahkan agama dan politik amnya dan dakwah dan politik khususnya (M Tahir, 2014).

Politik Islam di Malaysia

Parti politik Islam pertama di Tanah Melayu ialah Hizbul Muslimin. Ia ditubuhkan di Madrasah Al-Ihya As-Sharif, Gunung Semanggol, Perak pada 14hb. Mac 1948. Ia diketuai oleh Ustaz Abu Bakar Al-Baqir selaku Mudir Madrasah tersebut. Kegigihan dan semangatnya untuk memertabatkan Islam, memerdekakan negara dari jajahan British dan juga mendirikan sebuah negara Islam. Oleh sebab kekejaman penjajah, Parti Hizbul Muslimin telah diharamkannya. Selepas kemerdekaan Malaysia diperolehi dari British, pimpinan Melayu telah dibahagikan kepada dua bahagian. Satu bahagian dipelopori oleh perjuangan Melayu yang dikenali sebagai nasionalisme atau UMNO. Manakala satu bahagian lagi mempunyai dasar perjuangan bersifat keagamaan yang dipelopori oleh Parti Islam Malaysia (PAS) (A Jaafar, 2001). Mengikut fakta sejarah Parti PAS mula ditubuhkan pada 24hb. November 1951 kemudian Parti Islam Se-Malaysia didaftarkan sebagai sebuah organisasi pada 31hb. Mei 1955 dengan no pendaftaran 733 (Pulau Pinang). Sehubungan dengan itu PAS telah terpisah dari kerangka UMNO.

Pada tahun 1981, Dr. Mahathir telah dilantik sebagai Perdana Menteri Malaysia yang keempat. Di dalam pentadbiran Dr. Mahathir, nilai dan perinsip Islam cuba diterapkan pentadbiran negara. Dengan itu pada 29hb September 2001 Dr Mahathir telah mengistiharkan Malaysia sebagai negara Islam (Shukeri m, Muhamad Azrien, Mohd Alwee, y t.th). Malaysia mengiktiraf parti politik Islam berpandukan majoriti ahli-ahlinya beragama Islam. Begitu juga anggota-anggota tertinggi dalam sesuatu parti Islam mestilah beragama Islam. Tujuan utama sebuah parti politik Islam di Malaysia itu ialah memartabatkan agama Islam sebagai agama persekutuan dan juga menjalankan hukum atau syariat Islam. Oleh itu bagi politik Islam, polemik ilmiah di antara PAS dan UMNO dapat diterima dengan positif. Terdapat perbezaan politik di antara PAS dan UMNO ialah ideologi

Islam dan Melayu. Pas berkehendakkan Malaysia diperintah di bawah undang-undang *syariah* manakala UMNO mengiktiraf Malaysia sebagai Negara Islam tetapi dalam masa yang sama kepentingan Melayu dipertahankan. Perbezaan pendapat ini, dapat menyuburkan dunia pemikiran Islam di Malaysia. Ini diikuti pula pergerakan untuk membangunkan teori politik Islam (Al Qaradhawi, 2015) yang berguna untuk negara dan masyarakat dan untuk memertabatkan Islam dalam masyarakat (Shukeri m, Muhamad Azrien, Mohd Alwee, y t.th).

Sejak ditubuhkan pada tahun 1951, Pas mula bergerak sendiri secara aktif dan juga menjadi pesaing kepada Umno selepas peristiwa 13hb Mei. Pada tahun 1974-1978 PAS dan U bergabung. Mereka menanamkan semangat ingin berjuang atas *manhaj* Islam. Di samping itu, juga PAS mendakwa bahawa perjuangan mereka adalah berteraskan kesyukuran Islam manakala perjuangan UMNO lebih bersifat kemelayuan. Sehubungan dengan itu, perkembangan pengaruh Islam dalam masyarakat Melayu telah bermula dari awal hingga lahirnya dua parti politik Melayu yang mempunyai persepsi sendiri. Persepsi meninggikan lagi kefahaman Islam maupun dalam hidup bermasyarakat dan bernegara. (Faisal Abdul Hamid, Hamidah Jailani 2010).

Tertubuhnya AMANAH adalah merupakan penyelesaian terhadap konflik yang berlaku antara golongan ulama dan prodemokrasi dalam PAS. Bagi AMANAH selepas dilancarkan, parti ini cenderung untuk mengadakan kerjasama dengan PKR dan DAP bagi membentuk Malaysia baharu (Amanah.org 25 Ogos 2017). Secara rasminya AMANAH telah ditubuhkan pada 16hb. September 2015 dan telah diasaskan oleh Tuan Haji Muhammad Sabu. Parti ini terbentuk dari ahli- ahli PAS yang disingkirkan iaitu pemimpin progresif yang menyokong pemikiran tajdid di Muktamar PAS kali ke 60 di Kuala Selangor pada tahun 2015. Selepas itu Majlis Syura mengesahkan hubungan kerjasama dengan DAP dihapuskan dan Pakatan Rakyat dibubarkan.

Dengan keputusan itu menyebabkan wujud dua kumpulan pemimpin dalam PAS. Kumpulan yang pertama terdiri dari golongan muda yang mahukan PAS bersendirian. Manakala kumpulan yang kedua terdiri dari golongan profesional dan progresif. Mereka ini mahukan supaya hubungan PKR dan DAP dalam Pakatan Rakyat dikekalkan. Lalu mereka disingkirkan dan menubuhkan Parti baharu iaitu Parti Gerakan Harapan Baharu. Kemudian selepas itu, pada 16hb September 2015, Gerakan Harapan Baru dijenamakan semula dengan nama Parti Amanah Negara (PAN). AMANAH telah memilih dasar perjuangannya adalah Islam beserta dengan pendekatannya yang memperjuangkan Islam dan juga parti baharu yang berasaskan Islam (<https://amanah.org.my>). AMANAH juga memilih untuk bergerak sebagai parti yang membawa gagasan '*rahmatan lil 'alamin*' iaitu Islam adalah rahmat untuk seluruh alam. Di samping itu juga, AMANAH memperkenalkan konsep '*syamilah*' (menyeluruh) untuk memperjuangkan nasib semua bangsa dan kaum (Muhamad Helmy Sabtu, Muhamad Nadzri Noor, 2018).

Kedudukan Politik Menurut Syarak

Menurut F. Amin (2017), Agama Islam adalah *ad-din* yang *syumul*, lengkap dan sempurna, yang di dalamnya mengatur sistem kenegaraan dan politik. Agama Islam dan politik mesti berjalan seiring lebih-lebih lagi agama merupakan strategi dalam politik. Peranan agama Islam dalam politik Islam sebagai benteng yang kukuh, baik dari segi pemimpin atau anggota-anggota parti dan juga umat seluruhnya. Islam merupakan agama yang berkait dengan kerohanian, akhlak, pemikiran, pendidikan, jihad dan kemasyarakatan. Selain itu, Islam juga mengambil berat aspek ekonomi dan politik (Al Qaradawi, 2015). *Siyasah* menurut bahasa ialah “*sasa-yasusu-siyasatan*” yang membawa maksud tadbir, perintah, mengetahui. Adapun *al saus* bermakna *al riyasah* (kepimpinan) (Ibn Manzur, t.th). Makna umum bagi *siyasah* ialah mentadbir urusan manusia dan urusan dunia dengan syariat *ad din*. Pengertian makna khas pula ialah iaitu segala tindakan yang dikendalikan oleh pemerintah yang berdasarkan kepada sumber-sumbernya. Dengan tujuan untuk menghalang dan mencegah kerosakan yang belum terjadi atas tujuan pemulihan atau pembaikan (Zaharuddin Abdul Rahman, 2013).

Menurut Al Imam al Ghazali, dunia merupakan ladang bagi akhirat. Agama tidak akan sempurna kecuali dengan dunia. Kerajaan dan agama adalah saudara kembar. Agama merupakan asas, kerajaan adalah pengawalnya dan sebaliknya perkara yang tiada asas akan runtuh dan perkara yang tiada mempunyai pengawal akan sia-sia (Dhia al-Din Al Ris, t.th).

Politik yang berpandukan agama Islam akan melahirkan pemimpin dan anggotanya yang patuh tunduk dengan hukum Allah SWT dan berakhlak mulia. Tambahan lagi, pemimpin harus memikirkan kemaslahatan rakyat lebih utama dari kepentingan dirinya sendiri. Justeru itu, pemimpin dan anggotanya menjadikan Islam sebagai agama yang tertinggi dan hanyalah agama Islam yang diredai Allah SWT. Islam mengambil berat tentang politik kerana tanpa kepimpinan dan kuasa pemerintahan, manusia akan hancur lantaran asas-asas Islam dan *syariah* tidak diurus dengan betul. Oleh itu, Islam amat mengutamakan politik.

Tujuan politik Islam ditubuhkan untuk menegakkan hukum Allah SWT dan syariat Allah SWT dilaksanakan. Politik Islam juga mempunyai aktiviti yang tersendiri iaitu berdasarkan Surah Ali-‘Imran 104:

وَلْتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ وَأُولَٰئِكَ هُمُ الْمُفْلِحُونَ
١٠٤

Surah Ali-‘Imran (3: 104).

Maksudnya:

Dan hendaklah ada di antara kamu satu puak yang menyeru (berdakwah) kepada kebajikan (mengembangkan Islam) dan menyuruh berbuat segala perkara yang baik, serta melarang daripada

segala yang salah (buruk dan keji) dan mereka yang bersifat demikian ialah orang-orang yang berjaya.

Kepentingan Politik Islam dan Kewujudannya di Malaysia

Menurut Razaleigh Muhamat (2014), tujuan penubuhan parti politik Islam itu adalah menjadi satu kewajiban bagi umat manusia demi untuk mencapai kemaslahatan dan juga kepentingan hidup. Sebagaimana kaedah *fiqh* yang berbunyi:

ما لا يتم الواجب الا به فهو واجب

Maksudnya: Sesuatu kewajiban yang tidak akan sempurna melainkan dengan sesuatu perkara maka ia menunjukkan bahawa perkara tersebut adalah wajib.

Oleh itu, menurut beberapa ilmuan Islam, hukum melibatkan diri politik Islam itu adalah wajib kerana politik Islam merupakan *wasilah* atau cara untuk melantik kepimpinan atau *imamah*. Dengan itu keimamahan di letakkan untuk menggantikan tempat kenabian dalam memelihara agama dan politik keduniaan (Al Mawardi, 2006).

Politik Islam mempunyai ciri-cirinya yang tersendiri. Ciri-cirinya ialah: (1) kekuasaan umat, (2) masyarakat ikut berperanan dan bertanggung jawab, (3) kebebasan adalah hak bagi semua orang, (4) persamaan di antara semua manusia, (5) kezaliman yang mutlak tidak diperbolehkan dan usaha mengatasinya adalah wajib, (6) undang-undang di atas segalanya. Oleh itu ciri-ciri amatlah berbeza dengan ciri-ciri politik barat. Manakala politik barat pula membawa manusia kepada suatu pandangan dan menterjemahkan kepada ciptaan mereka sendiri. Ini bermakna mencipta hukum lain yang bertentangan dengan syariat Islam. Golongan ini adalah berfahaman sekular iaitu yang memisahkan politik dengan agama (Razaleigh Muhamat, 2014). Ini adalah kerana pemerintah mereka memisahkan agama dengan politik (Ibn khaldun, 1961). Menurut Ibn Taimiyyah, (t.th) pemimpin yang zalim adalah lebih baik dari rakyat hidup tanpa pemimpin.

Mengikut perinsip politik Islam, umat atau rakyat yang menentukan siapakah yang akan menjadi pemimpinnya. Maka di sini menunjukkan pemimpin tiada mempunyai hak memilih dirinya sendiri untuk menjadi pemimpin ataupun wakil-wakil di kawasan-kawasan yang terlibat. Diikuti pula rakyat juga mempunyai kuasa untuk menjatuhkan pemimpin andaikata pemimpin itu gagal menjalankan tanggung jawabnya dan tidak disenangi oleh mereka (Al Mawardi, 2006). Ini bermakna rakyat mempunyai kuasa dalam menentukan kepimpinan dan juga sentiasa prihatin dengan natijah atau kesan dari kepimpinan itu. Maka di sini menunjukkan kekuasaan dan juga sifat amanah perlu ada dalam jiwa rakyat. Oleh itu, kedua-duanya perlu ada demi untuk kemaslahatan hidup rakyat di dunia maupun di akhirat (Akram Kassab, t.th)

Di samping itu, mandat rakyat bermula dengan keterlibatan dalam parti samada sebagai pengundi, wakil yang terpilih mengikut parti-parti yang bertanding dan calon yang terpilih sebagai pemimpin. Semuanya ini adalah melalui sistem pilihan raya. Maka melalui kaedah pilihan raya proses pemilihan pemimpin dikendalikan. Menurut Al-Qaradhawi (2015), kaedah mengundi melalui urusan pilihan raya adalah diterima oleh Islam memandangkan ia adalah urusan keduniaan kerana tiada nas *qat'i* atau *zanni* yang melarangnya. Mengundi juga diqiyyaskan dalam perkara kesaksian. Sebagaimana firman Allah SWT:

وَأَشْهَدُوا ذَوِي عَدْلٍ مِّنكُمْ وَأَقِيمُوا الشَّهَادَةَ لِلَّهِ

Surah At-Talaq (65: 2)

“Adakanlah dua orang saksi yang adil di antara kamu dan hendaklah kamu (yang menjadi saksi) menyempurnakan persaksian itu kerana Allah semata-mata.”

Hal ini dikuatkan lagi dengan fatwa yang dikeluarkan oleh Syeikh al-Azhar iaitu Syeikh Ahmad Thayyib dan Mufti Mesir iaitu Syeikh ‘Ali Jum’ah. Mereka sepakat mengatakan bahawa undian adalah wajib kerana ia merupakan satu penyaksian (Zuhaili Saiman 1987) Manakala para ulama kontemporari juga berselisih pendapat mengenai hukum pilihan raya. Walau bagaimanapun, majoriti ulama berpendapat bahawa hukum sistem pilihan raya adalah harus. Ini berpandukan kepada kaedah *fiqh* iaitu:

الأصل في الأشياء الإباحة حتى يدل الدليل على التحريم.

Maksudnya: Pada asalnya hukum tiap-tiap sesuatu adalah harus kecuali ada dalil yang mengharamkannya.

Berpandukan kepada kaedah *fiqh* tersebut, majoriti ulama’ berpendapat bahawa hukumnya harus. Pendapat ini digunapakai oleh negara Islam pada masa ini. Antara ulama’ yang menyokong pendapat ini ialah Sheikh Muhammad Rashid Redha, Al Imam As-Syahid Hasan Al- Banna , Akram Kassab t.th dan Yusuf al-Qaradhawi (Zuhaili Saiman 1987). Manakala hujah yang kedua bersandarkan hadis berikut:

“أَنْتُمْ أَعْلَمُ بِأَمْرِ دُنْيَاكُمْ”

Daripada Anas katanya, Rasulullah SAW bersabda,

“Kamu lebih mengetahui akan urusan dunia kamu”

(Al-Muslim 875)

Maksudnya:

Rasulullah SAW menegaskan kepada umatnya dalam urusan keduniaan hendaklah di laksanakan mengikut kemampuan dan kesesuaian zaman. Berpandukan kepada pilihan raya merupakan wasilah untuk mencapai sesuatu yang wajib iaitu pemerintahan Islam. Oleh itu bagi perkara yang telah ada nas hendaklah di laksanakan. Kewajipan masyarakat atau umat ikut serta mengambil peranan dan bertanggung jawab dalam sebuah negara Islam itu. Dalam kata lain rakyat hendaklah sentiasa prihatin dan berwaspada terhadap sesuatu perubahan yang berlaku dalam negara kita dan juga masyarakatnya. Lebih-lebih lagi dalam negara Islam mempunyai masyarakat yang terdiri dari pelbagai agama dan etnik yang berbeza-beza (Nazri Muslim, Nik Yusri Musa, Ahmad Hidayat Buang, 2011).

Menurut Abdul Qadim Zallum (2001), adalah menjadi kewajipan bagi individu ataupun jemaah Muslim secara umumnya sentiasa mengumpul maklumat dan seterusnya berperanan menyampaikan dakwah kepada masyarakat sejagat. Disamping itu juga kefahaman yang mendalam tentang Islam dan usaha yang berterusan hendaklah diaplikasikan dalam kehidupan manusia sejagat. Justeru, peranan dakwah dalam politik amatlah dititik beratkan demi untuk memberi kefahaman kepada masyarakat. Kefahaman yang menyeluruh dalam bidang agama Islam iaitu merangkumi akidah, ibadah, akhlak serta politik dan syariat Islam. Ini adalah kerana agama Islam merupakan agama yang *syumul* merangkumi segala tindahtanduk kehidupan. Pemimpin hendaklah mencernakan tindak tanduknya mengikut apa yang ada dalam Al-Quran.

Syarat syarat keterlibatan dalam politik Islam di Malaysia

Malaysia merupakan sebuah negara Islam yang mengamalkan sistem demokrasi berparlimen dan berpelembagaan (www.bharian.com, 2018). Dalam konteks di Malaysia, pemerintahan Islam melalui kaedah pilihan raya. Sehubungan dengan itu, rakyat boleh mendaftarkan diri sebagai pemilih secara sah mengikut syarat-syarat umur yang telah ditentukan. Dalam proses pilihan raya ini, rakyat mengambil peranan iaitu sebagai pengundi, wakil rakyat dan seterusnya pemimpin.

Kepelbagaian parti di Malaysia masing-masing bertanding dalam pilihan raya. Oleh itu, dasar-dasar parti dan ceramah umum serta berkempen serta diadakan di kawasan calon yang akan bertanding. Begitu juga dengan penampalan poster dan manifesto parti dikemukakan. Parti politik Islam yang terdiri dari UMNO, PAS dan PAN masing-masing dengan manifestonya. Menurut Ibrahim (1989), meskipun di antara UMNO dan PAS masing-masing mempunyai dasar dan perinsip yang tegas dalam merealisasikan cita-cita Islam, namun tidak bermakna tiada ruang langsung untuk mencari titik pertemuan antara kedua-dua parti. Ini adalah kerana adanya perbezaan dasar perjuangan antara UMNO-PAS terhadap Islam yang menjadikan cita-cita politik yang berbeza antara parti tersebut. Ini pasti menyukarkan orang-orang Melayu mencapai perpaduan dan permuafakatan (Abdul Rahman Mahmood, Jaffary Awang, Zakaria Stapa 2015). Walaupun demokrasi adalah datang dari barat namun di Malaysia tidak mengambil sistem ini

sepenuhnya bahkan sistem *syura* diaplikasikan dalam politik Islam. Oleh itu, kerjasama di antara pemerintah, golongan Islamik, parti pembangkang dan NGO adalah sangat di perlukan. Tindakan ini boleh menguntungkan rakyat kerana boleh mewujudkan landasan baru dalam politik Islam dan demokrasi Islam (Muhammad Rumaizuddin Ghazali, 2017)

Menurut Wan Zahidi (2000), Malaysia memiliki ciri-ciri yang selari dengan sebuah negara Islam. Ciri- ciri itu ialah *syura* melalui parlimen yang wujud dalam negara Malaysia adalah menepati kehendak *syura*. Selain dari sistem *syura*, *bai'ah* juga terdapat dalam keterlibatan parti politik. Bai'ah ialah perjanjian di atas ketaatan, seperti pembai'ah memberi janji taat setia kepada pemimpin bahawa ia bersedia menerima segala tanggungjawab yang dipertanggungjawabkan ke atas dirinya samada dalam keadaan suka atau tidak suka (Ibnu Khaldun, 1961). Oleh itu, bai'ah merupakan Sabda Rasullullah Saw: Dari Mujasyi'r.a., katanya: Saya menghadap Nabi s.a.w. bersama saudara saya, lalu saya berkata: “Terimalah *bai'ah* kami untuk hijrah”. Lalu beliau bersabda: “Hijrah telah lalu”. Lalu saya bertanya: “Untuk apakah tuan menerima *bai'ah* kami?” Beliau bersabda: “Untuk membela Islam dan berjihad”

(Al-Bukhari 1064)

Sistem Pilihan Raya mengikut Perspektif Islam di Malaysia

Keterlibatan pengundi dalam pilihan raya adalah merupakan bilangan yang ramai kerana merangkumi rakyat yang beragama Islam dan juga bukan Islam. Pengundi hendaklah berumur dua puluh satu tahun ke atas. Di samping itu, hendaklah berkelakuan waras dan amanah. Oleh kerana itu pengundi pada pandangan Islam adalah sebagai seorang saksi yang adil, amanah dan sejarah kehidupan yang elok. Panduan pengundi sebelum membuat undian di Malaysia

- Pengundi hendak mengundi dengan ilmu pengetahuan. Maknanya sebelum membuat undian sudah mengetahui maklumat tentang calon yang hendak dipilih.
- Pengundi muslim hendaklah mendengar segala sesuatu tentang calon yang hendak dipilih. Maknanya ada hak memilih iaitu memilih calon yang terbaik.
- Dasar dan manifesto parti juga menjadi ukuran pengundi.

Batasan calon sebagai wakil rakyat dan wakil parlimen di Malaysia

- Calon itu tidak boleh mencalonkan dirinya sendiri
- Calon yang mengisi kekosongan oleh sebab tidak ada orang lain yang layak maka ianya mencalonkan dirinya sendiri. Hal ini sebagaimana pelawaan Nabi Yusuf a.s. dalam membantu negara Mesir dalam hal pengurusan kewangan negara (Muhammad Zuhaili Saiman, 1987).

Kelayakan sebagai pemimpin di Malaysia

- Pemimpin yang menjadi pilihan rakyat ialah hendaklah mempunyai kemampuan (quwwah), amanah dan ketelusan.
- Pemimpin yang mempunyai kemahiran dan berkebolehan untuk mentadbir dan juga sentiasa menyokong perjuangan Islam.
- Pemimpin yang tidak berkompromi dengan orang yang zalim atau tidak adil membuat keputusan.

Cara perlantikan pemimpin di Malaysia adalah selari dengan kaedah perlantikan ketua negara mengikut Islam iaitu melalui proses pilihan raya (Mohd Izhar Ariff, Alias Azhar, 2010). Justeru itu, pilihan dibuat adalah mengikut suara majoriti dan ini adalah merupakan konsep *syura*. Pilihan ini melambangkan pemimpin itu ialah pemimpin yang mempunyai kriteria asas iaitu yang mempunyai keupayaan dalam melaksanakan amanah (Muhammad Zuhaili Saiman, 1987). Sebaliknya bagi pemimpin yang tidak amanah akan membiarkan rakyatnya dalam kesusahan. Ini adalah kerana pemimpin tersebut membolot kekayaan dan kemewahan untuk dirinya serta kroni-kroni sahaja (Yusuf Al Qaradhawi, 2015).

Ciri-ciri parti yang bertanding juga diambilkira oleh rakyat dalam menentukan pilihan mereka. Ini bermakna rakyat juga menitikberatkan siapa pemimpin parti dan juga anggota-anggotanya. Manifesto dan dasar parti juga diambil perhatian oleh rakyat disamping akhlak dan kandungan percakapan calon (Muhamad Zuhaili Saiman, 1987). Jika diidapati pemimpin gagal dalam melaksanakan peranannya sebagai seorang pemimpin yang amanah dan berwibawa disebuah negara Islam itu. Maka adalah dibolehkan rakyat menjatuhkan atau menggantikan dengan pemimpin yang lain (Al Mawardi, 2006). Rakyat juga dibolehkan menegur pemimpin andai terdapat kesilapan dalam kepimpinannya. Begitu juga Islam membenarkan pimpinan diturunkan jika terdapat kepimpinan yang menyeleweng (Zaharuddin Abdul Rahman, 2013). Justeru, secara umumnya melibatkan diri dalam politik Islam adalah diwajibkan. Ini bermakna bagi setiap rakyat yang layak mengundi adalah diwajibkan melibatkan diri dalam pilihan raya demi untuk memilih calon pemimpin untuk mewakili rakyat.

Panduan sebagai pengundi di Malaysia

Mendaftarkan diri sebagai pengundi atau pemilih di dalam negara Malaysia adalah *wajib* mengikut hukum *syarak*. Adalah menjadi suatu kewajipan di atas pengundi *wajib* memilih mana-mana calon yang mempunyai cita-cita melaksanakan ajaran Islam dan hukum Islam dalam negara Malaysia. Selain dari itu juga adalah digalakkan pengundi memastikan parti mana yang menjadi pilihannya.

Ini bermakna rakyat yang mengundi telah memberikan penyaksiannya terhadap wakil yang dipilihnya. Saksi itu mestilah seorang yang adil lagi amanah. Begitu juga adalah menjadi

kewajipan terhadap wakil itu menjalankan kewajipannya dengan penuh amanah dan bertanggung jawab. Sebaliknya bagi rakyat yang tidak mengundi adalah menjadi kesalahan kerana menidakkan penyaksiannya. Oleh itu, Islam menjaga dalam hal mengundi dan pilihan raya serta mewajibkan rakyat keluar mengundi (Al-Qaradhawi, 2015).

Jikalau sekiranya wakil yang kurang amanah mendapat kemenangan dengan majoriti lebih banyak berbanding dengan wakil yang amanah. Ini adalah disebabkan ada rakyat yang tidak mengundi dengan itu tidak memberikan penyaksiannya. Dengan ketewasan calon yang amanah dalam pilihan raya boleh melambatkan proses pemerintahan Islam. Ini bermakna syarat dan panduan perlu ada dalam pilihan raya iaitu memastikan rakyat menunjukkan penyaksiannya dalam mengundi di pilihan raya. Sebagaimana firman Allah SWT:

وَلَا يَأْبَ الشُّهَدَاءُ إِذَا مَا دُعُوا

Al- Baqarah (2: 282).

“Janganlah saksi-saksi itu enggan (memberi keterangan) apabila mereka dipanggil”

Bagi mereka yang memilih wakil rakyat atau pemimpin atas dasar kepentingan hubungan kekeluargaan atau juga manefaat peribadi bermakna telah melanggar syarak. Dalam ertikata dia telah melanggar penyaksian semata-mata kerana Allah SWT (Al-Qaradawi, 2015).

Calon sebagai wakil rakyat atau wakil parlimen di Malaysia

Menurut Hairol Anuar Makdin, Zakaria Stapa (2012), pilihan raya merupakan wadah pemilihan pemimpin atau wakil rakyat dan wakil negeri yang bertanding. Ini bermakna untuk menegakkan pemerintahan Islam di Malaysia suara majoriti di dalam dewan rakyat atau dewan negeri adalah amat diperlukan. Oleh itu untuk mendapat suara majoriti dalam dewan rakyat atau dewan undangan negeri mestilah memenangi kursi terbanyak di dalam dewan tersebut. Calon yang bertanding sebagai wakil rakyat atau wakil parlimen mempunyai peranan yang penting dalam sebuah pemerintahan Islam.

Menurut (Al-Qaradhawi, 2015), Demokrasi dianggap sebagai jaminan mengekalkan kebebasan dan keamanan daripada kezaliman pemerintah. Oleh itu demokrasi sebenar ialah yang mewakili kehendak rakyat. Sebaliknya bukannya kehendak pemimpin diktator atau kumpulan yang sengaja untuk mendapatkan kemanfaatan dengannya (Al-Qaradhawi, 1996). Berpandukan kepada konsep *bai'ah* dalam pilihan raya. Konsep *bai'ah* merupakan perjanjian taat setia ke atas pemimpin yang

dilantik. Ini bermakna dalam melakukan pengundian memilih calon, pengundi akan memilih calon yang disenangi dan dipersetujui untuk menjadi pemimpinnya (Al Ansari, 1980). Berdasarkan dari *ijma'* sahabat dan juga *ijma'* ulama yang berpendapat menegakkan pemerintahan Islam adalah *wajib*. Kewajipan memilih pemimpin bagi yang berkeelayakan adalah *wajib* berdasarkan kepada *ijma'* sahabat (Al- Mawardi, 2006).

Menurut Ibnu Hazm pula menyatakan majoriti Ahlul-Sunnah, Murjiah, Syiah dan Khawarij sepakat mengenai kewajiban menegakkan *imamah* (pemimpin) dan juga wajib mentaatinya. Pemimpin juga hendaklah adil dalam menegakkan hak-hak Allah dan memimpin mengikut hukum *syariah* yang di bawa oleh Rasulullah SAW (Ibnu Hazm t.th). Sewaktu Nabi SAW wafat, perkara utama tumpuan sahabat-sahabat ialah memilih pemimpin untuk mereka. Perkara ini didahulukan dari pengebumian Nabi SAW. *Bai'ah* terhadap Saidina Abu Bakar didahulukan dan seterusnya menyerahkan urusan pentadbiran urusan mereka kepadanya. Bermula dari *ijma'* yang bersejarah inilah para ulama Islam telah berdalilkan kewajiban melantik Imam atau pemimpin dalam Negara Islam (Al-Qaradawi, 2015)

Sebuah negara Islam memerlukan seorang pemimpin yang berwibawa dan bertanggung jawab. Selain dari itu pemimpin mestilah berkemampuan, amanah dan menolak kezaliman. Justeru itu Allah SWT akan memperelokkan umat atau rakyat yang ramai mengikut keadaan yang elok oleh pemerintahnya (Al- Qaradawi, 2015). Adalah sewajarnya pemimpin kerajaan di Malaysia sesiapaupun dan dari mana parti pun hendaklah bersungguh-sungguh menerapkan pemikiran yang telah digariskan oleh Al Ghazali dalam menyusun negara (Alies Anor Abdul, t.th).

KESIMPULAN

Berdasarkan kepada pendapat ulama-ulama muktabar menyimpulkan keterlibatan dalam politik adalah *wajib*. Ini adalah berdasarkan melantik pemimpin Islam itu adalah *wajib syar'i* mengikut *ijma'* sahabat. Walau bagaimanapun adalah menjadi hak rakyat itu sendiri untuk memilih parti yang mereka kehendaki mengikut pengetahuannya mengenai kemampuan sesuatu parti itu menegakkan nilai-nilai Islam dan keadilan. Berdasarkan perbandingan parti politik Islam di zaman Rasulullah SAW dengan politik Islam kontemporari di Malaysia mempunyai beberapa perbezaan seperti sistem *syura* digunakan dalam politik Islam di zaman Rasulullah SAW manakala sistem demokrasi diamalkan dalam politik Islam kontemporari di Malaysia. Begitu juga dengan tugas *amar makruf nahi mungkar* dilaksanakan melalui kepimpinan di zaman Rasulullah SAW sebaliknya melalui politik Islam di zaman kontemporari ini, tugas ini tidak diambil berat oleh kepimpinan. Ini menjadikan kelemahan dakwah dalam politik yang patut dilaksanakan oleh pemimpin dan juga anggota parti. Sehubungan dengan ini, institusi *ulama'* dan *umara'* hendaklah juga memainkan peranan untuk menjadikan politik Islam terus wujud di Malaysia. Justeru, ia

memerlukan hubungan harmoni di antara *umara'* (pihak yang berkuasa) dan *ulama'* dengan tujuan membangunkan masyarakat yang adil dan saksama.

RUJUKAN

Al- Quran

Abdul, Alies Anor. www.yadim.com.my

Abdul Rahman, Mohd Zaidi. 2014. Aplikasi Maqasid Syariah Dalam Pentadbiran Negara: Satu Tinjauan Sejarah Islam

Abdul Rahman Mahmood, Jaffary Awang, Zakaria Stapa. 2015. Survival Politik Muslim Malaysia. Selangor. Penerbit UKM Bangi

Akram, Kassab. Tt. Al -Intikhabat Ahkam wa Dhawabit. Dar As-Salam

Al- Ansari, Abdul Hamid Ismail. 1986. Al-Shura wa 'atharuha fi Dimoqratiyyah. Kaherah. Matba'ah al-Salafiyyah

Al- Bukhari, Muhammad bin Ismail. t.th. Shahih al -Bukhari. Dar al Makrifah, Beirut

Al Ghazali, Ihya Ulumuddin , Beirut, Dar Kutub al Ilmiyyah

Al- Mawardi, Abu Hassan 'Ali. 2006. Al- Ahkam Al- Sulthōniyyah. Darul Hadis, Kaherah

Al- Muslim, Muslim ibn al- Hajjaj. t.th. Shahih al- Muslim. Darul Al Khilafah Al 'ulya

Al-Qaradāwi, Yūsuf. 2015. Fiqh Daulah Menurut Perspektif Islam. Tej. Selangor. Syabab Book Link

Al-Qaradāwi, Yūsuf. 1996. Min fiqh Daulah. Kaherah. Darul Shuruq

Al-Rais, Dhia al- Din. t.th. An- Nazhāriyyat As- Siyasiyyah Al- Islamiyyah, Ed. Keenam

Amin, F. 2017. Pemikiran dan Konsep Negara Islam. Universiti Malaya

Faisal Abdul Hamid, Hamidah Jailani, 2010. Beberapa Pandangan Mengenai Islam dari Perspektif Parti Politik Melayu. Universiti Malaya

Ghazali. Mohd Rumaizuddin. 2017. Pengamalan Demokrasi di Dunia Islam Menurut Perspektif Islam. Universiti Sains Islam Malaysia

- H. Maisarah. 2012. Sejarah Kebangkitan Islam di Malaysia. Universiti Malaya
- Hairol Anuar Makdin, Zakaria Stapa. 2012. Pemilihan Kepimpinan Politik melalui Pendekatan Nilai-nilai Islami. Jurnal Pengajian Islam
- Ibnu Hazm, Imam Ibnu Hazm, t.th. Al-fashl fi al-milal wa ahwa' wa an-Nihal, Kairo, al-Mathba'ah al-Adabiyyah
- Ibnu Khaldun, Abdul Rahman. 1961. Muqaddimah Ibnu Khaldun. Beirut, Maktabah al Maarif
- Ibn Manzur, Muhammad Mukram, t.th. Lisan Al 'Arab. Darul Shōdīr. Ed. Ketiga. Beirut
- Ibnu Taimiyyah, Taqiuddin, 1969. As-Siyasah ash Syari'iyah fi Islah ar Ra'I wa Rar'iyyah, Beirut. Dar al fikr
- Ibrahim Ahmad .1989. Konflik UMNO PAS dalam Isu Islamisasi. Selangor: IBS Buku Sdn Bhd.
- Jaafar, Azhar. 2001. Sejarah dan Perkembangan Parti Islam Se- Malaysia (PAS). Universiti Malaya
- Jaffary Awang, Abdul Rahman Mahmood. 2015. Bab 5, Wacana Identiti Melayu dalam Kalangan Ahli Politik Muslim Malaysia. Survival Politik Muslim Malaysia. Selangor. Penerbit UKM Bangi
- Al-'Anbary, Khalid Ibn'Ali Ibn Muhamad. 2008. Sistem Politik Islam menurut Al-Quran, Al-Hadis dan pendapat Ulama' Salaf. Kuala Lumpur. Telaga Biru Sdn.Bhd
- M. Tahir, 2014. Konsep Berdakwah Melalui Politik Dalam Islam. Universiti Malaya.
- Mohd Zin, Abd Aziz . 2012. Strategi Dakwah Dalam Sirah Nabi SAW. Jabatan Dakwah dan Pembangunan Insan, Universiti Malaya.
- Mohd Izani Mohd Zin, Hussin Mohamed. 2005. Cabaran Politik Muslim di Malaysia dan Indonesia
- Mohd Izhar Ariff Mohd Hashim, Alias Azhar, 2010. Perinsip dan Model Negara Islam. Definisi dan Aplikasinya di Malaysia
- Muhamat, Razaleigh. 2014. Perlaksanaan Dakwah dan Politik Zaman Rasulullah. Universiti Kebangsaan Malaysia.
- Muhamat, Razaleigh. 2014. Kedudukan Politik dalam Islam. Universiti Kebangsaan Malaysia.
- Muhamad, Helmy Sabtu, Nadzri Mohamed Noor. 2018. Persaingan Ideologi PAS dan AMANAH dalam Politik dan Pilihan Raya. Selangor. Penerbit UKM Bangi

Nazri Muslim, Nik Yusri Musa, Ahmad Hidayat Buang, 2011. Hubungan Etnik di Malaysia dari Perspektif Islam.

Saiman, Muhammad Zuhaili. 1987. Sembang-sembang Politik Islam. Telaga Biru Sdn. Bhd

Shukeri, M, Muhamad Azrien, Mohd Alwee, Y.t.th. (Polemik Negara Islam di antara Parti Islam (Pas) dengan Parti Melayu (Umno) : Analisis Perbandingan

Syed Ahmad Hussein , 1994. Pengantar Sains Politik. Kementerian Pendidikan Malaysia.

Wan Teh, Wan Zahidi. 2000. Malaysia Daulah Islamiyyah. Paper presented at the perjumpaan YAB Perdana Menteri bersama Pegawai-pegawai Agama Islam Seluruh Malaysia, Putrajaya

Zaharuddin. Abd.Rahman. 2013. Indahnya Politik Islam. Selangor. Galeri Ilmu Sdn.Bhd

Zallum, ‘Abd al- Qadim. 2001. Pemikiran Politik Islam. Jawa Timur. Al- Izzah

Sejarah Penubuhan Amanah, <https://amanah.org.my>

(Amanah.org 25 Ogos 2017)

Demokrasi, pilihan raya dan tanggung jawab warganegara, www.bharian.com, 28 April 2018